

OSKAR MONTERO



Sanz Eusko Ikaskuntzako buruekin elkartu da

Miguel Sanz Nafarroako presidentearentzat astea bereziki euskaltzalea izaten ari da. Joan den asteartean Jean Haritzelhar euskaltzainburuarekin bilera egin zuen, eta atzo goizean Eusko Ikaskuntzako buruekin elkartu zen. Nafarroako Jauregian, Juan Jose Goirienak (Eusko Ikaskuntzako presidente berria), Jose Miguel Velez de Mendizabalek (Eusko Ikaskuntzako diruzaina) eta Mikel Aranburuk (Eusko Ikaskuntzako Nafarroako presidenteorde berria) euren erakundearen zereginen berri eman zieten Sanzi eta Markotegi Hezkuntza eta Kultura kontseilariari. Goirienak adierazi zuenez, agintariak «lagunarteko» jarrera agertu zuten. «Aurrerantzean Eusko Ikaskuntzak eta Nafarroako Gobernuak elkarlanerako bideak indartuko dituzte».

Institutuetako autoritarismoa salatu zuten atzo Iruñean 1.500 ikaslek

■ Ehunen bat polizia nazionalak inguratu zuten. IAK antolatutako manifestaldia

Juan Kruz Lakasta / Iruñea

IKASLE ABERTZALEEK institutuetako autoritarismoa salatzeke atzo eguerdian Iruñean egindako manifestaldiak 1.500 ikasle elkartu zituen, eta hura inguratzen han ziren ehunen bat polizia nazional ere. Irakaskuntza er-taineko ikasleek ez zuten bortizkeria erabiltzeko inolako asmorik agertu. Hala eta guztiz ere, ikasleek *Elkartasunean indarrak bilduz, autoritarismoari kaña* zioen pankarta zabaldutik bezain pronto, liskarren aurkako armez ongi hornituriko 40 polizia jarri ziren manifestaldiaren alde batean, eta beste horrenbeste beste aldean. Halaber, hiru kamioneta jarri zituzten manifestarien aurrean, eta beste bi atzean. Ikasleek modu horretan inguratuta egin behar izan zuten Autobus geltokian hasi eta Gurutze plazan amaitu zen ibilbidea. Josu Belez IAKo kideak adierazi zuenez, «Gurutze plazako institutuan bereziki, eta oro har Iruñeko institutu guztietan behin eta berriz, etengabe, zapaltzen ari dira ikasleen eskubideak: adierazpen askatasunerako eskubidea, batzarrak egiteko eskubidea, greba egiteko eskubidea...».

IAK behin baino gehiagotan salatu dutenez, autoritarismoa gero eta nabarmenagoa da ikastetxeetan. X

«Aurrerapauso nabarmenak» espero ditu Olabarriak Justiziaren euskalduntzean

Batzordea eratu dute EAEko Justizia auzitegiak, Jaurlaritzako sailek eta CGPJk


E milio Olabarria Espainiako Botere Judizialaren Kontseilu Nagusiko kideak erdiko eperako «aurrerapauso nabarmenak» espero ditu EAEko Justizia Administrazioaren euskalduntzean, baina «modu arrazionalen» egitea nahi du, eta ez «den-dena epe laburrean lortu nahi dutenen proposamenen arabera».

Luis Karlos Garcia / Gasteiz

LANKIDETZA HITZARMENA berri zuten atzo Eusko Jaurlaritzako Justizia Sailak eta Espainiako Botere Judizialaren Kontseilu Nagusiak (CGPJk). Heziketarako hitzarmen horren arabera, Euskal Autonomi Elkartearen diharduten epaile eta magistratuak hobekuntza ikastaroak jasotzen dituzte, besteak beste, jurisdikzio kontentzioso-administratiboaz, euskara eta Justiziako Administrazioaz edo azkenaldi honetako erreformez.

Azken hilabeteotan harrotutako hautsen ondoren, Justiziaren euskalduntzeak nagusitasun handia hartu zuen atzo hitzarmena berritzeko ekitaldian. Olabarria CGPJko bokalak aitortu zuenez, «euskararen erabilpena normalizatuta egotetik oso urrun da», baina, dena den, erdiko epean dextente hobetuko delakoan dago.

Izan ere, atzo bertan batzorde mistoa eratu zen, CGPJko ordezkariak, Eusko Jaurlaritzako Justizia, Kultura eta Administrazio Publikoak sailetako arduradunek eta EAEko Justizia Auzitegi Nagusiko kideek osaturik, euskal-



Emilio Olabarria CGPJko kidea, Ramon Jauregi Justizia sailburuaren ondoan, hitzarmena sinatu aurretik.

OLALDE

duntzea areagotzeko plana diseinatu behar duena. Batzordeak gaur egungo egoeraren berri izan nahi du lehenengo eta behin, eta horretarako inkesta bat egingo die epaile eta magistratuak. Behin horien hizkuntza egoera zein den jakinda, euskararen erabilpena zabaltzeko ekimenak helduko die.

Honako hauek dira batzordekideak: Emilio Olabarria bera, Jose de la Mata CGPJko Formazio zuzendaria, Manuel Maria Zorrilla EAEko Justizia Auzitegi Nagusiko lehendakaria, Josu Erkoreka Herri-Arduralaritzaren Euskal Erakundeko idazkari nagusia, Iñaki Sanchez Justizia sailburuordea, Josune Ariztondo Hizkuntz Politikarako sailburordea, Arantza Aurrekoetxea

Administrazioaren Hizkuntz Normalizaziorako zuzendaria eta Inmaculada de Miguel Administrazioarekiko Harremanetarako zuzendaria.

Olabarriak euskararen egoeraz egindako txostena da batzordearen abiapuntua. Horren ondorengotik, egokiro ikusi zuten Justizia Administrazioaren euskalduntzean parte hartzen duten sektoreetako ordezkarien arteko batzordea eratzea.

Alde guztiek hitzartu • Emilio Olabarria arabarrak adierazi zuenez, batzorde mistoaren asmoa da zuzenbideko alde guztiek hitzartutako lana egitea, horrela euskararen presentzia normalizatu ahal izateko. «Euskara

epaitegietan normalizatuta izatea Botere Judizialaren Lege Organikoak dioena betetzea besterik ez da», ohartarazi zuen CGPJkoak, «hots, euskara jakitea lehenetsunezko meritutzat hartu beharra dagoela, Zuzenbide Forala eta Zuzenbide Zibil propioa jakitea bezala».

EAEn Justizia Administrazioari buruzko auzia gori-gori da Euskal Herrian azkenaldian. Olabarriak eta CGPJko bokal Benigno Varela Jose Antonio Ardanza lehendakariari gaiari buruzko azalpenak eman zitzioten joan den asteartean egindako bisitaldian. Elkartearen Justizia Administrazioan «euskara bultzatzea» dutela helburu jakinarazi zioten. X

Alvaro D'Ors 'honoris causa' doktore izendatu dute Erroman

Efe / Erroma

NAFARROAKO Unibertsitateko zuzenbideko katedradun Alvaro D'Ors *honoris causa* doktore izendatu zuten atzo Erromako La Sapienza Unibertsitatean. Javier D'Ors haren seme eta zuzenbideko katedradunak jaso zuen oheretako saria.

Zuzenbide alorrean Alvaro D'Orsek egin duen lana nabarmendu zuten atzoko ekitaldian hitz egin zutenek. Alvaro D'Orsek ekitaldirako prestatutako hitzaldia semeak irakurri zuen. «Zuzenbidea epailek onartzen dutena da», esan zuen Javier D'Orsek aitaren izenean.

Alvaro D'Ors 1961. urtean hasi zen Nafarroako Unibertsitatean klaseak ematen. Sari ugari jaso ditu azken urteetan. Azkena, Eusko Ikaskuntzak eta Euskadiko Kutxak batera antolatzen duten Gizarte Zientzien saria. X